



11. februar 2014

UPA14/57

Inatsisartut suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiupparput:

Arnat angutillu ajornartorsiornerminni qimarngusariaqalernerminnilu naligiinnerusumik sullinneqarsinnaanissaat siunertaralugu Nunatsinni qimarnguiit atorneqarnerat pillugu aammalu tassunga tunngatillugu qimarnguiit pisariaqartinneqarnerat aammalu kommunit allallu qimarnguinnik ingerlatsiumasut nutaamik qimarnguiliortoqarnissaanut imaluunniit pioreersut iluarsartuunneqarnissaannut periarfissaqartinneqarnissaannik misissuisoqarnissaa siunertaralugu qimarnguiit pillugit Naalakkersuisut misissuineramik ingerlatsinissaannik Inatsisartut aalajangiiffigisassaattut siunnersuut

(Inatsisartuni ilaasortat Knud Kristiansen aamma Gerhardt Petersen, Atassut)

Tunngavilersuut:

Arnat angutillu pisariaqartitsiffimminni naligiillutik pisortanit ikiorserneqarsinnaanissaat ATASSUT-mit pingaartilluinnarparput.

Nunatsinni qimarnguiit pinngortikkiartorneranni ullumikkullu ingerlanneqarneranni arnat qimarngunissaminnik aammalu tassanngaannartumik immikkut aaqqissuussinikkut ikiorserneqarnissaminnik periarfissaat angutinut taamatut pisariaqartitsisunut sanilliullugu annertunerusut, aammalu qimarnguiit aaqqissuussaaneranni arnat sutigut tamatigut salliutinneqartartut ATASSUT-mit paasivarput.

Ineriartorneq taamatut iluseqartinneqarpoq naak massa Qimarnguiit pillugit Namminersorerullutik Oqartussat nalunaarutaat nr. 18, 8. december 2004-meersoq naapertorlugu arnat angutillu naligiimmik pineqartussaagaluartut.

ATASSUT-mit timitalimmik uppersarsivarput angutit qimarnguinnut saaffiginnikkaluarlutik qimarnguiit arnanut meeqqanullu taamaallaat iserfigineqarsinnaasutut aaqqissuussaasarsimasut, isumarpullu naapertorlugu tamanna naapertuutinngilaq.



Taamatuttaaq ATASSUT-mit nalunnngilarput sineriassuatsinni qimarnguiit arlalissuit illutoqarsuusartut sivikitsuinnarmilluunniit najussallugit naleqqutinngitsut, taamaammat ATASSUT-mit kissaatigaarput Namminersorlutik Oqartussat taamaallaat qimarnguiit ingerlanneqarnerannut tapiisinnaasutut inissisimanerat allannngortinneqassasoq, tamatumalu malitsigisaanik Kommunit imaluunniit namminersorlutik ingerlataqartut qimarnguissamik sanaartorumasut nunatta karsianit tapiiffigineqarsinnaanissaminnut periarfissaqartinneqalissasut.

Ilaqutariit isumaginninnikkut ajornartorsiuteqartut pitsaanerpaamik pilertortumillu sullinneqarlutik ajornartorsiutiminnit aniguisinnaanissaannut inatsisitigut sinaakkutaritinneqartut piffissamut naleqquttuusariaqarput aamma pisortat tamassuminnga naammassinninnissaminnut pisussaaffii ersarissuusariaqarput.

Taamaammat aqqissuussaaneq ullumikkutut ittoq naleqqutinngitsoq ATASSUT-mit isumaqarpugut. Namminersorlutik Oqartussat aamma Nunatsinni Kommunit kiisalu sullissisarnerup namminersortunit pisortat sinnerlugit annertusarneqarnera innersuussutigalugu namminersorlutik suliassamik kivitsiumasut suleqatigiilluarpata kikkullu qanoq akisussaassuseqarnerannut pisussaaffeqarnerannullu paarnaaqqasutut ittumik inissisimaneq qimanneqartariaqartoq ATASSUT-mit isumaqarluinnarpugut.

Tamattami piumavarput angujumallugulu Kalaallit Nunatsinni ilaqutariit sapinngisamik tamarmik peqqillutik ingerlalluarlutillu inuiaqatigiit ineriartortinneqarneranni peqataassasut, tamanna pitsaanerpaamik anguneqassappat ikiorserneqartariaqalernermi tapersorneqartariaqalernermi siunnersorneqartariaqalernermilu periarfissat aamma pitsaasuutinneqartariaqarput.

Ullumikkut Kalaallit Nunatsinni qimarnguiit aqqissugaalluarnunissaannik aammalu pisariaqartitsisunut tamanut, arnaappata angutaappataluunniit naligiissumik periarfissaqartitsinissaq inatsisitigut isumannaatsumik qulakkeerneqartariaqartoq ATASSUT-mit isumaqarpugut.

Tamanna tunngavigalugu suliamut atatillugu Inersimasunut paaqqinniffiit immikkut siunertallit pillugit Inatsisartut peqqussutaata allannngortinneqarnissaanik nutarterneqarnissaanillu



pisariaqartitsineq misissorneqassasoq ATASSUT-mit kissaatigaarput Inatsisartut peqqussutaat nr. 5, 11. maj 1993-imeersoq taassumalu tunngavia Inersimasunut paaqqinniffiit immikkut siunertallit pillugit Inatsisartut peqqussutaat nr. 6, 28. april 1988-imeersoq ilanngullugit nalilersorlugillu naleqqussarneqassasut ATASSUT-mit kaammattuutigissavarput.

Pisortanut aningaasatigut allaffissornikkullu kingunerisassat:

Misissuinermut tunngatillugu aningaasartuutit aningaasaliussaareersut iluini naammassineqarsinnaassasut naatsorsuutigineqartariaqarpoq, missiliorparput tamanna 100.000 kr.-it tungaanut naleqassasoq, tamatumalu kingunerisaanik Qimarnguiit pillugit inatsisitigut sinaakkutarineqartut ullutsinnut naleqqussarlugit piareersaataasumik sularineqarnerannut ukiumut sulinerup affaatut naleqassasoq naatsorsuutigineqassaaq.

Tamatuma saniatigut Nunatsinni Kommunit aamma/imaluunniit Namminersorlutik ingerlataqarumasut qimarnguinnik nutaalianik sanaartortitsissappata imaluunniit pioreersunik iluarsartuussititsissappata sanaartugassap iluarsagassalluunniit nalingata affaata tungaanut Namminersorlutik Oqartussat tapiisinnaanissaat periarfissaalerpat tamanna aningaasartornerulernermik kinguneqassaaq.

Maannangaaq taggikkuminaappoq aningaasartornerulerneq qanoq annertutigissanersoq, taamaattorli pilertortumik pitsaasumillu ikiorsiisoqarneratigut innuttaasut ataasiakkaat ilaqutariilluunniit nukissaqarluarlutik nalinginnaasumik inuiaqatigiit ineriartortinneqarneranni peqataaqqilernissaat anguniarlugu aningaasaliinerussaaq imminut akilerluartussaq.

Namminersorlutik inuussutissarsiuteqartunut aningaasatigut allaffissornikkullu kingunerisassat:

Soqanngilaq

Innuttaasunut aningaasatigut allaffissornikkullu kingunerisassat:

Soqanngilaq, taamaattorli arnat angutillu qimarngusariaqalernerminni annertusisamilluunniit qimarnguiit aqcutigalugit ikiorserneqartariaqalernerminni periarfissaat annertusineqassapput.